
ВИЛОЯТДА ДАСТУР ДОИРАСИДА 43 МИНГТА ИШ ЎРНИ ЯРАТИЛАДИ

Муҳтарам Президентимиз ташаббуси билан мамлакатимизда камбағалликни қисқартириш ва шу мақсадда янги иш ўринлари яратиш бўйича аниқ ишлайдиган самарали тизим яратилди.

Бу жараёндаги саъй-ҳаракатларни ўзаро мувофиқлаштириш мақсадида “Темир дафтар” юритиш тартиби жорий қилинди. Вилоятдаги тўртта сектор фаолияти ана шу мезон асосида ташкил этилиб, ҳудудларда эҳтиёжманд оилаларни камбағалликдан чиқариш ва уларда тадбиркорлик кўникмаларини шакллантириш мақсадида ўқув семинарлари ўтказилмоқда.

Шу йилнинг 23 июнь куни вилоят Тадбиркорлар марказида ташкил этилган навбатдаги семинарда бу борада олиб борилаётган ишлар таҳлил ва танқид руҳида сарҳисоб этилди.

Таъкидлаб ўтилганидек, давлатимиз раҳбарининг жорий йил 5-6 июнь кунлари вилоятга ташрифи давомида илгари сурилган эзгу ташаббуслари доирасида вилоятдаги тўртта сектор кесимида 2020 йил давомида 20 минг 168 та лойиҳани амалга ошириш режалаштирилган. Натижада вилоятда эҳтиёжманд оила аъзолари учун 43 минг 314 та янги иш ўрни яратилади. Бу вилоятда аҳоли турмуш фаровонлигини оширишга қаратилган ислохотлар самарасини оширишда муҳим аҳамиятга эга.

Семинар давомида Республика Марказий банкининг Фарғона вилоят бош бошқармаси бўлим бошлиғи Зоҳиджон Деҳқонов, вилоят бандлик бош бошқармаси бошлиғи ўринбосари Рустам Мамадалиев, вилоят туризмни ривожлантириш бошқармаси бошлиғи МузаффарТемировларнинг маърузаси тингланди. Маърузаларда вилоятда эҳтиёжманд оилаларни камбағалликдан чиқариш, оилавий тадбиркорликни ривожлантириш, жамоат ишларига жалб этиш ҳамда туризмни ривожлантириш борасида олиб борилаётган ишларга алоҳида эътибор қаратилди.

Шунингдек, семинарда иштирок этган вилоят ҳокимининг биринчи ўринбосари Мирзоҳид Убайдуллаев ҳозирги кунда вилоятнинг барча шаҳар- туманларида 4 та сектор раҳбарлари, сектор штаблари томонидан 43 минг 314 та эҳтиёжманд оилалар рўйхати шакллантирилганини таъкидлади.

Бу борада меҳнатга лаёқатли ишсиз фуқароларнинг асосий қисмини ҳақ тўланадиган жамоат ишларига жойлаш, ўзини ўзи банд қилишига эришиш, агросаноат лойиҳаларини ишга тушириш ва ғалладан бўшаган ерларга такрорий экин экиш орқали бандлигини таъминлаш бугунги куннинг устувор вазифаси эканлиги қайд этилди.

Фарғона вилояти ҳокимлиги Ахборот хизмати

2020-06-23 22:57:21